

16 di fevrâr dal 1976

Siôr Santul,

fra pôs dîs, ai 25 di chest, a saran zà tre agns che Lui al è cun nô. In tal aniversari de Sô consacrazion - ivestidure - incoronassion - crocifission, mi permet di mandâi il gno pinsîr plen di afiet e di stime e, s'al acete, ancje di amicizie. Se Diu ûl, cul timp si cognossarìn simpri miei e si darìn une man come fradis pal ben de cheste nestre Glesie furlane ch'è je diventade ancje la Sô Glesie sperìn par dute la vite.

A còntin i libris che i vierîrs di une volte, cuant che a lavin a diliberâ cualchi presonâr o a conquistâ alc di grant, a sintivin mil vôs ch'è cirivin di fâur pôre e di fermâju. Ma lôr a son lâts indenat istès!

Tal vanzeli si lei che Gjesù i domandà al vuarp di Betsaide: "Viodistu alc?" E chel, vierzint i vôi, al disè: "O viôt la int come lens che a cjaminin". Alore Gjesù i metè un'âtre volte lis mans parsore dai vôi e chel al scomençà a viodi ben. Al viodeve dut clâr (Marc 8, 23 - 25).

Nissun profete, a prin colp, al viôt clâr, però plui al va indenat e plui il Signôr i fâs viodi. Se si ferme o s'al torne indaûr, nol viôt nuie. Sâl va indenat, prime al viodarà la int come lens ma po' al sarà inceât de Lûs. "O salvareis lis vuetris animis cul tignî dâr" (Luche 21, 19).

Che il Signôr Lu incolmi de sô pês e de sô gracie e che a lu conservi.

Mandi.

Cun rispjet di fî e cun afiet di fradi.

pre Antoni Beline, plevan